



Ir cun ina maschina precautamain è sin in plazzal da gronda valur.



Infurmaziuns da Werner Senn (cun il casc en maun) davart il schurmetg personal grazia ad in bun equipament.



Co evitar accidents en in foss ha explitgà Aurelio Quinter.



Resgiar, er quai è stà ina part dal curs da segirezza.



Chargias e pais, tar quel tema ha referi Anton Solenthaler.



Albert Disch (a san.) declera a dus lavurers la segirezza principala tar ina puntanada.

FOTOS G. N. STGIER

# «Sicuro» è la soluziun

## Curs da segirezza da la bransch da construcziun

DA GION NUTEGN STGIER / ANR

■ **Grazia a las mesiras da segirtad è il dumber dals accidents sin ils plazzals sa reduci ils davos 25 onns gist per 42%. Tuttina è er da preschent la segirezza il pli impurtant urden per lavurants e manuals. Quai conferma lura er il grond interess per ils curs da segirtad cun var 300 participants.** Tenor la lecha federala dad assicuranzas da segirezza e l'ordinaziun da prevenziun dad accidents è mintga patrun sez responsabel per la segirezza en ses manaschi e sin ils plazzals. La bransch da construcziun e cunzunt er la Societad grischuna dals impressaris da construcziun dattan gronda paisa sin las mesiras da segirtad ed cumplencha las ordinaziuns er grazia a la mesira «sicuro».

### In tema central

Er l'unìun tetgala dals impressaris da construcziun svizzers s'engascha ferm cun il tema segirezza e metta gronda prioritad al tema central: prevenziun e segirtad. Adina puspè infurmescha l'unìun naziunala ses commembers, porscha curs per reducir ils accidents sin ils plazzals e

sustegna cunzunt er ils curs surregiunals cun il tema segirezza durant la lavur. Grazia a las mesiras spezialas da las organizaziuns da construcziun, da las assicuranzas dad accidents sco la Suva èsi stà pussaivel ils davos 25 onns da reducir il dumber dals accidents sin ils plazzals da bajegiari per 42%. Quai è er d'attribuir als dus curs da la Societad grischuna dals impressaris da construcziun che han lieu mintga dus onns a Cuira ed a Zernez. Aevan las interpresas da construcziun il 1990 sin 1000 lavurers anc 321 accidents èn quai stads il 2015 be pli 186 accidents.

### Ina buna scolaziun è da gronda valur

La consequenta promoziun e la scolaziun da la segirezza da lavur èn oz indispensablas pe mintga travagl da construcziun. Prevenziun e segirtad tutgan oz er tar la capacitad da concurrer e quai per mintga interpresa da construcziun ed er autras. A disposiziun stattan oz numerus posts da cussegliaziun, chaschun han tuts er da far ina scolaziun en chaussa segirezza nua ch'i vegn tematisà il tratcament da situaziuns da ristg, mussà intgins meds da segirezza auxiliars ed er co ir enturn cun da tuttas sorts maschinas. Ina pussaivladad

è lura er da frequentar ils curs da prevenziun che ha anc lieu oz a Cuira ed en in mais a Zernez.

### Persunas dal rom

S'annunziads per ils dus curs da segirezza a Cuira ed a Zernez èn radund 300 lavurants e manuals. L'occurrer cunza in mez di e pled e fatg dattan persunas dal rom, umens che sa fatschentan professiunalmain cun la segirtad en la bransch da construcziun ed er represchentants da las assicuranzas da segirezza. Il percurs da segirtad cumpiglia plis posts e tar mintgin survegnan ils participants infurmaziuns en pled e maletg e lura er en la realitad. Per la realisaziun dal curs segna cun *Albert Disch* in um cun ina gronda experienscha sin il sector da construcziun auta e bassa. Il percurs ha per exempel posts nua che la construcziun da puntanadas e la segirezza da quellas èn in tema, armadras da schurmetg ed er foss na mancan betg. L'equipament da schurmetg personal è er in dals gronds aspects cun discurren da la segirtad. Ir enturn endreg cun ina chargia u cun il pais da tut la rauba da construcziun saja er ina prvenziun fitg impurtanta, ha ditg Disch.



Daniel Ardüser cun ina gruppa da lavurants.